



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 3



Canada PM Justin Trudeau dak long agi aon



Ratan Chakraborty-i Tripura Assembly Speaker inyaktsü akok

VOL. XVIII NO. 326 (ADOK 326) DIMAPUR

RASEMNÜ (WEDNESDAY)

RONGJUI (SEPTEMBER) 08, 2021 ₹ 5.00

Sep 13 nungi Foothill Road atema lungkak aittsü

"Young Naga Action Committee for Foothills Road" tentetogo

Dimapur, September 7, 2021 (TYO): Nagaland state sorkari September 12, 2021 tashi nung Foothill Road atema telangzüba tajung ka magütsüra September 13, 2021 nungi lungkak aittsü.

Mongulbarnü NFHRCC-i Dimapur nung amenoka aliba kin hohotem, CNSA, DENSU, ZSUN aser lanur telok balala den senden amendang iba teletetba agi.

September 13 nungi lungkak aittsü Dimapur nung dang asütsü aser iba mapang PWD (R&B) Dimapur Division shibangtsüba den sorkar gari senzüba noktangtsü ta senden nung adenertemi lemtet.

Tanü senden nung adenertemisa "Young Naga

Action Committee for Foothills Road" ta Core Group ka tentettsü teletetba agi.

Core Group nung züngsemtem:

1. Central Naga Students' Association (CNSA) - Convenor
2. Dimapur Eastern Naga Students' Union (DENSU) - Co-convenor
3. Zeliang Students' Union Nagaland (ZSUN) - Co Convenor
4. Lotha Youth Organisation (LYO) - Co-Convenor
5. Western Sumi Youth Front (WSYF) - Co-Convenor
6. Dimapur Ao Youth Organisation (DAYO) - Co-Convenor

COVID-19 Nagaland: Nisung 47 dak putet, 1 asü

Dimapur, September 7, 2021 (TYO): Mongulbarnü Nagaland nung nisung 47 dak COVID-19 aliba putet aser parnok züngsema nisung ajak agi 30,435 kümogo. Külén, tanü COVID-19 agi shiranger ka asüba züngsema nisung 632 kümogo.

Tesüba ghonda 24 tsüngda Dimapur nung nisung 23, Kohima nung 16 aser Phek nung 4 dak COVID-19 aliba putet.

Covid agi shiranger ka asübaji Dimapur nung liasü.

Mongulbarnü COVID-19 puteta alir nisung 50 tashi taneptsü angu. Parnok züngsema taneptsü angur ajak agi 28,178 kümogo aser ibaji 92.58% lir.

Nagaland nung tang nisung 709 anepaludar aser COVID-19 puteter nisung 916 tashi tanga state temi ogo.

Afghanistanung Taliban sorkar kümetetogo

New Delhi, September 7, 2021 (Agencies): Taliban leadership council mendenbuba Mullah Hasan Akhund-i Afghanistan nung Taliban sorkar indang Prime Minister inyaktsü.

Mongulbarnü Taliban spokesperson Habiullah Mujahid-i iba osang metetdaksü. "Mullah Akhund den yariteptsü atema Mullah Baradar deputy prime minister shimer" ta Mujahid-isa ashi.

Maneni, Foreign Affairs indang minister Amir Mutaqqi aser deputy minister Sher Abbas Stanikzai na shim.

Afghanistan sorkar tasenba nungsa Interior Minister atema Sirajuddin Haqqani, Defence

Minister atema Mullah Yaqoob, Justice Minister atema Abdul Hakim aser Information Minister atema Khairullah Khairkhwana nung shimogo, Taliban spokesperson Mujahid-i tanü metetdaksü.

Pakistan nung ISI Director Lt Gen Faiz Hameed-i Taliban lenirtem den ajurteptsü atema Kabul semdangba sülen ghonda 72 lir sorkar tasen akümba osang metetdaksüogo.

"Onoki tang nungdakba ministry tem ketdangtsüba aotsü atema minister tem dang shia atar. Lia aodang onoki tanga ministry asoshi minister tem metetdaksütsü" ta Mujahid-isa ashi.

Advisor Sukhalu-i DoSE newsletter sayatsüogo

Kohima, September 7, 2021 (TYO): Advisor School Education, K.T. Sukhalu, IAS (Retd)-i DoSE newsletter sayatsüogo. Iba newsletter ya Education Department-i küm nung pezüben adoker.

Morung hall, Directorate of School Education, Kohima nung Teachers Day benjung amongdang Advisor Sukhalu-i DoSE newsletter sayatsü.

Advisor Sukhalu-i o jembidang sempet angur ajak nem tenüngsang agütsü. "Sorkari policy temyanggur skaitenji mapakümai nyaktsüba

tesayurtem lir" ta pai ashi. Tesayurtem ya linük yangertem lir aser shisaliok bushibaren ya teti melenshir. Anungji tesayurtemi tensa den putepa angazüktsüba aser tajungtiba agi tanurtem anitetsüba, ta paisa ayongzük.

"Education Policy 2020 ajanga temelenshi aika bener arutsü aser primary level nung tamendakdak akangshitsüba. Tesayurtemi kaketshir shia dak aliba sempettem tajungtiba nung anepalua anitetsüba" ta Advisor Sukhalu-isa metetdaksü.

Minister Kronu-i Nagaland nung tsünüsenbongba osang lemsatep

CENTRE DANG AGRICULTURE INFRASTRUCTURE RENLOKTSÜ ATEMA GRANTS-IN-AID MESHIR

Dimapur, September 7, 2021 (TYO): Planning & Parliamentary Affairs Minister, Neiba Kronu-i Mongulbarnü Union Minister for Agriculture & Farmers' Welfare, Narendra Singh Tomar den Video Conference ajanga senden nung denogo.

Iba senden nung Horticulture Advisor Mhathung Yanthan aser Agriculture Production Commissioner, Y. Kikheto Sema, IAS na aden.

Senden nung Andhra Pradesh, Telangana, Tamil Nadu, Kerala, Karnataka, Assam, Arunachal Pradesh, Manipur, Meghalaya, Mizoram, Nagaland, Sikkim aser Tripura nungi Chief Minister, Agriculture Minister aser tanga ketdangtsürtem aden.

Parnoki Agriculture Infrastructure Fund (AIF), Pradhan Mantri Kisan Samman Nidhi (PM-KISAN), Digital Agriculture, National Mission on Oilseeds and Oil Palm (MNOOP) onüktem lemsatep.

Centre sorkari Scheme of Agriculture Infrastructure Fund (AIF) tenzütsüba atema pelar saka Nagaland nungbo AIF ya imlaba ama meinyaker kechiyong bank temi aluyimer aser entrepreneur nem sen maputsür, ta Neiba Kronu-i senden nung ashi.

"Centre sorkari Nagaland state nem Grant-in-Aids ajanga agriculture infrastructure talila renloktsü atema yaritsü mepishir" ta pai ashi.

August 31, 2021 tashi nung Pradhan Mantri Kisan Samman Nidhi (PM-KISAN) ajanga aluyimer 2,00,082 indang account nung Rs. 265.52 crore enoktsüogo. Maneni, June 30, 2021 tashi nung Kissan Credit Card (KCC) ajanga KCC beneficiaries 35,959 nem Rs. 223.54 crore agütsüogo, ta Minister Kronu-isa metetdaksü.

"Nagaland nung ali kibur indang inyakyim balaka asübayong land records indang digital database ano mapa küma metenzük lir. Ajisüaka, Department of Agriculture aser Soil & Water Conservation Department-i GIS Cell den yaritepa iba mapa inyaktsü" ta paisa ashi.

"2014-15 nungi Department-i National Mission on Oilseeds and Oil Palm (MNOOP) indang mapa inyaka arudar. Tang tashi nung MNOOP ajanga Mokochung, Wokha, Mon, Dimapur, Peren aser Longleng lendenlen ali hectare 4623 shi ka nung mapa inyakdar aser 2021-2022 tsüngda department-i ali hectare 1100 nung mapa inyaktsü sentong lir" ta Minister Kronu-isa senden nung ashi.

Nagaland sorkari ali hectare 15,000 nung oil palm tsünütsü sentong lir. Külén, Shivasa company-ia September 2021 tom tashi nung Fresh Fruits Bunches (FFBs) alizüktsü molunga agizükogo. August 2022 tashi nung parnoki Oil Extraction Mill

ka yanglutsü shiogo, ta paisa metetdaksü.

Covid wara liaka Agri and allied departments-i senden aser workshop aika ayonga agiogo. March 15, 2021 nung parnoki APEDA den yaritepa Dimapur nung buyer seller meet sentong tulu ka ayongzüka agiogo aser iba nung mongin nisung aika aden, ta Kronu-isa ashi.

"Nagaland State Agriculture Marketing Board (NSAMB) kübok market channels lenmang lapokdar aser "Naturally Nagaland" tenüng nung yimi tulutemi local products belener. Tang mezüng atema July 19, 2021 nü London-i Naga King Chilli bener yokogo. Ano tanga linüktemi Bamboo-shoot, Pineapple, Kiwi, Cardamom, Ginger, Sweet & Juicy Cucumber; Tree Tomatoes amala yoktsü sentong lir. Ajisüaka, chiyungtsü belenshiba maparen nung sen aika endoker" ta paisa metetdaksü.

"Naga Coffee ya kanga tajung lir aser iba ya Nagaland nungi tangaleni yokba chiyungtsü mezüngbuba lir. Tesüba küm ishika international market nung Naga Coffee ayoker. Nagaland nung tang tashi nung ali hectare 10,000 shi ka nung coffee lu ayimer aser 2030 tashi nung ali hectare 30,000 nung ayimtsü alizüing yua lir. Maneni, Nagaland-i tanga state tem dangi Rubber yoker" ta Minister Kronu-isa senden nung osang lemsatep.

Nagaland nung asüba Mizo tsür atema Mizoram MLA-i President Kovind dang teyari meshir

Aizawl, September 7, 2021 (Agencies): Nagaland nung arishi küm 20 tain Mizo tsür ka asüba atema Mizoram MLA K Pachhunga-i President Ram Nath Kovind dang teyari meshiogo.

Tetsür la ya Assam Rifles nung medical attendant ka liasü aser September 3, 2021 nü Nagaland nung ali aliba tesep anasa arem nung sür lia angu.

La ya Lunglei district nungi liasü aser iba jagi Lunglei South MLA Pachhunga-i tasür nem temeten agütsütsü atema balaka bushisüngdang asütsü mepishiogo.

"Assam Rifles nung medical attendant ama inyaker Jones C. Malsawmkimi ji September 1 nikongdang 5:00 ako meta Shukhovi, Dimapur nungi samar bushiteptsü tenzük" ta MLA Pachhunga-i President Kovind dangi züluba shidi nung shia lir.

Anogo asem lir September 3 nü la aliba tesep nungi kilometre ishika pilar arem nung la indang tasümgang angu, ta paisa ashi.

Iba dak sendakba atema FIR agütsü aser temolung meleme bilemer nisung 4 tashi apu. Ajisüaka, bushisüngdanga arudang la "drug overdose" agi



Jones C. Malsawmkimi (F/photo)

asüba ama bushitet, ta MLA Pachhunga-isa ashi.

"La ya ozü medemer tajung ka jala lir aser lai mozü achiba osang kecha mali aser taküm libaliroa tajung liasü. Anungji la "drug overdose" agi asü ta asübaji magizüker" ta paisa ashi.

La tasümgang indang forensic noksatem ajanga teka sangshiba angur aser iba ajanga la ya pur aoba, tashiyim agi shi nung medemba aser tepsetba ama bilemer, ta Mizoram MLA-isa metetdaksü.

"Armed forces nung inyaker tetsür ka la mapa inyakdak yamai taküm samatsüba tia ajuruba atema tebilemstü abener. Iba

ajanga linük nung tetsürtem taküm lendong nungi jenbua maliba sayur. Anungji tasür nem temeten shitak agütsütsü atema nü dang iba tatalokba nung tebang aitsü mepishir" ta Pachhunga-i President Ram Nath Kovind dang ashi.

MLA Dr. K. Pachhunga-i züluba shidi ya Union Home Minister Amit Shah, Union Defence Minister, Mizoram Governor, Mizoram aser Nagaland Chief Minister tem, Chief of Army Staff aser Director General of Assam Rifles dangia yokogo.

"Tetsür la indang tasümgang angudang la indang tenük maliasü aser iba ajanga la ya tepsetba ama sayur. Iba tatalokba atema Nagaland police-i auto driver 4 pua asüngdangya asümgang la "drug overdose" asüba agi parnoki yaritep ta langzü. Ajisüaka, bushisüngdangba osang nung temolung masür aser iba jagi temeten angütsü atema Indian President dangi shidi zülü" ta Pachhunga-i osangbener dang ashi.

Tetsür la indang tasümgangji Deobarnü lar yimi bener aruogo, ta paisa ashi.

People's Plan Campaign indang State level committee senden amen



Kohima, Rongjui/Sept. 07 (TYO): 2022-23 kum atema Gram Panchayat Development Plan (GPDP) yanglutsü asoshi State Level Committee on People's Plan Campaign-2021 senden ka Secretariat Conference Hall, Kohima nung September 7, 2021 nü mena liasü.

Iba senden nung jembiba mapang Nagaland indang Chief Secretary J. Alam, IAS ajanga ashiba agi, sendaktepa aliba department ajunga densema shilem agitsü atema comprehensive plan based ka

asoshi iba campaign ya tenzük. Iba sentong yagi yimtsüngtem kanga ajangzüksü, anungji sendaka aliba department ajungai nendaka yaritsüla, aji asünung dang iba campaign takok angutsü aser iba mapa atema taküm ya tajungtiba asütsü, ta pai ashi.

Paisa nodal department den osang agiteptsü asoshi sendaka aliba department ajak nungi officer kaka shimtsü totuyuba agütsü.

Sentong tenzüka jembiba mapang Commissioner &

secretary, RD, Neposo Theluo, IAS ajanga ashiba agi, economic development aser social justice atema GPDP renemtsü asoshi Gram Panchayats ya tongtipang kumogo.

India nung yimdkayimtsüngtem melenshitsu atema flagship scheme tem mapa kuma aser tajungtiba nung inyaksü asoshi panchayats temi tongtipang shilem agiteter, ta pai ashi.

People's Plan Campaign indang rasaa jembiba mapang, campaign yimya nung GPDP renemtsü asoshi ibai tasa tajung ka lir, koba "Sabki Yajana Sabka Vikas" nungja agütsür October 2, 2021 nungi January 31, 2022 tashi alitsü, ta pai ashi.

Iba campaign mapang taruba financial year (2022-23) atema GPDP renemtsü asoshi Gram Sabha senden amentsü.

Ano maneni September 10, 2021 nikongdang 1:00 ako nungi tenzüka Line Department Nodal Officer atma anogo ka orientation training agütsütsü.

September ita tenzükur Dimapur nung rakzükraakter ti puogo

Dimapur, Rongjui/Sept. 07 (TYO): Mejangjaba nisung kari Patkai Bridge, NH 29 nungi truck driver ka tashiyim agi pua bener oa NSCN (K1) aser NSCN (IM) tenüng nung küm shia meshiba saru sen 27,000 meshi ta September 1, 2021 nü osang tejangja ka angazüka liasü. Iba dak sendakba nung bushisüngdangba mapang driver ya kumzük aser iba mapa tamajung inyakba nung tai tonglokja alisang arishi küm 35 tain Alam Shah apu, ta Dimapur Police sangdong ka ajanga ashi. Iba dak sendakba nung ken o ka Chumoukedima PS nung benoka lir.

NSCN (R)/GPRN Ministry of Chaplee Affairs tenüng nung September 2, 2021 nü 6th Mile area nung business establishment tem nung 'information slips' agütsüba mapang arishi küm 31 tain SS Under Secretary NSCN (R) Khekugha Aye aser arishi küm

43 tain Hovikhu Sumi pua liasü.

Iba dak sendakba nung ken o ka Chumoukedima Police Station nung benoka lir, ta ashi.

Diezeph Village, Dimapur nung truck driver tem dang sen meshiba mechi September 2, 2021 nü arishi küm 41 tain SS. Leacy NSCN/GPRN-K (Nikki), Yehoto Aye pua liasü.

Iba dak sendakba nung ken o ka Sub-Urban Police Station nung benoka lir, ta sangdong ajanga ashi.

September 3, 2021 nü Naga Bazaar Murgipatti Dimapur nung entzü wholesale nung ayoker dang nungi NSCN (R) tenüng nung sen meshia lia arishi küm 35 tain Shikavi Choppy pua liasü. Iba mapang pa ket nungi sen 32,000 nguteta liasü. Iba dak sendakba nung ken o ka East Police Station nung benoka lir, ta ashi.

September 3, 2021 nü NNC/GDRN tenüng nung

Nahabari Dimapur nung tata mobile aser carrier auto dang 'yearly tax' meshia lia arishi küm 27 tain Lutoi K Achumi pua liasü. Pa ket nungi sen 7,200 ngutet. Iba dak sendakba nung ken o ka East Police Station nung zülüoka lir.

M.P.Road, Dimapur nung aliba medical wholesale distributor dang nungi September 4, 2021 nü 'yearly tax' meshi alia arishi küm 24 tain Mika Choppy, SS 2nd Lieut. NNC/NA pua liasü. Iba dak sendakba nung ken o ka East Police Station nung benoka lir, ta ashi.

Sangdong ajangasa ashiba agi, United Naga People Government NNC (Parent Body) tenüng nung 7th Mile, Dimapur nung work permit agütsüba nung küm 49 tain SS Captain NNC Tokishe Yeptho pua liasü. Iba dak sendakba nung ken o ka Chumoukedima Police Station nung benoka lir.

NIPF-i Deputy Commissioner, Dimapur office belentsü memolunger



Dimapur, Rongjui/Sept. 07 (TYO): Nagaland Indigenous People's Forum (NIPF) pur Executive senden ka September 6, 2021 nü Dimapur nung mena liasü aser iba senden nung P. Pius Lotha, Advisor aser Ex. President, NIPF ajanga NIPF indang Constitution saya liasü.

Iba senden nung Deputy

Commissioner, Dimapur indang office tesem tasenbai belener aotsüba onük kanga junga asadanga jembia aser nüburttem anisüngzüksü asoshi tim ki-o-jen aser nungdakbatem anepalu mesütsü tashi Deputy Commissioner indang office belentsü lemtetba anema nokdangtsü pangjema liasü,

kechiaser tesem tasenba nung timtem jenti lir, ta NIPF Media Cell sangdong ka ajanga ashi. Dimapur kanga kera ainba dak rangloker senden nung sorkari Rural areas atema Deputy Commissioner tasenka yanglua administrative aser nüburttem anisüngzüksü asoshi Complex tasenba nung amenoktsüla, ta jembia liasü.

Deputy Commissioner tem dang essay tetoktepba ayongtsü ashi

Dimapur, Rongjui/Sept. 07 (TYO): Commissioner & Secretary to Governor, T. Mhabemo Yanthan IAS ajanga sangdong ka nung Deputy Commissioner ajak dang Nagaland nung aliba kaketshirtem atema "Relevance of Gandhiji's thoughts for building a peaceful and prosperous Nagaland" onük nung essay competition ka ayongzüksü metetdaksüogo.

Iba tetoktepba nung High School aser Higher Secondary School nung azüngertemi shilem agitetsü aser essay ya ojang 2000 shi asütsüla, ta ashi.

Kaketshirtemi parnok indang essay ya online ajanga pei Deputy Commissioner dangi yoktsüla aser takok angur ya district telemsa nung shimtsü. District shia mezüngbuba jenjang angur nem senpet sen 25,000 den kuli kaket aser tanabuba jenjang angur nem senpet sen 15,000 den kuli kaket Governor nungi agütsütsü, ta ashi.

District shia tejangrar kaketshir ajunga nem metetdaksütsü asoshi Deputy

Commissioner temi tekeratiba nung nungdakba mera agitsüla, ta Commissioner & Secretary ajanga ashi.

Kaketshirtemi agütsüba essay tem tendanga/repranger takok angur sangdongtsü atema Deputy Commissioner temi pa mendenpuba sür committee ka shimtetsüla.

Iba tetoktepba nung takok angur nem tetushi aser sempet ya Raj Bhavan nung October 2, 2021 nü Mahatma Gandhi asoba anogomung sentong nung agütsütsü. Iba atema osangtsüsang ya shilem agir ajunga nem metetdaksütsü, ta ashi.

Deputy Commissioner temi iba essay agütsütsü atema anogo tatembang lemtetsüsa asür kaketshirtemi essay yoktsü sapang/email agütsütsüla.

Deputy Commissioner temi district shia nungi mezüng aser tanabuba jenjang anguba kaketshir indang tejangja, contact number dena, Raj Bhavan nem September 27, 2021 tashinung tongtsütsüla, ta sangdong ajanga ashi.

Janata Dal (United) indang NEEC tentetogo

Dimapur, Rongjui/Sept. 07 (TYO): Janata Dal (United) indang tir Rajiv Rajan Singh (MP & Leader Lok Sabha) ajanga Janata Dal (U) indang North East Executive Council (NEEC) shimtetogo.

Iba NEEC nung züngsemtem yamai alitsü:

1. NSN Lotha, Convenor
2. K.C Tyagi, National Secretary General, member
3. Sanjay Jha, National General Secretary, Member
4. Afaq Ahmad Khan, National General Secretary, In-charge North East, Member

5. Ramprit Mandal, National Secretary, In-charge Manipur, Member

6. Anil Hegde, member

7. President, Arunachal Pradesh

8. President, Nagaland Member

9. President, Manipur Member

10. President, Tripura Member

11. President, Meghalaya Member

12. President, Mizoram Member

13. President, Sikkim Member.

Janata Dal (United) indang NEEC ya September 15, 2021 nungi mapa inyak tenzüksü, ta general secretary, Afaq Ahmad Khan-i sangdong ka ajanga ashi.

Tuensang District Planning & Development Board senden menogo

Dimapur, Rongjui/Sept. 07 (TYO): September ita asoshi Tuensang District Development and Development Board pur senden ya Deputy Commissioner indang Conference Hall, Tuensang nung Deputy Commissioner aser Vice Chairman, DPDB, Tuensang lenisüba kübok September 7, 2021 nü mena liasü.

Iba senden nung Government Middle School Tuensang village ya High School senden nung jembia aser company shia dang tekeratiba aser sorkar nem osang agütsütsü atema nungdakba maparen inyaksü atema Education department Tuensang nem nungloktsü.

Senden nungsa Tuensang village nung Guesthouse-cum-Village Museum yanglutsü lemtet aser Noksen Village Council ajanga benokba ama Nokse nung District Park yanglutsü atema sorkar dangi temelaba meshia yokogo.

Board ajanga Tuensang District atema SDG Committee ka tentetsü asoshi jembia liasü.

Phenjan Sector, St John Sector-A Tuensang Town nung anentsü aluba aser ali atsüoka

aiba ajanga kibong aika timtemba dak sendakba tebilemstüa iba senden nung benoka jembia aser Land Resources department, Tuensang nem mera balala agidaksütsü atema District administration Tuensang ajanga tsüngtong oa asameyangtsü nungloktsü

Tuensang District nung network connectivity kanga majungba indang iba DPDB senden nung jembia aser company shia dang tekeratiba nung mapa shidak inyaka network shidak agütsütsü asoshi zülutsü renema liasü.

Senden nung jila indang Dumping Ground onük nung ajemdaker PHED ajanga tsünglanglen ayimba tzü tendangba osang agütsü aser nisung ajemtsü asoshi metemtsü, ta ajiteta tekeratiba nung tapet mera agitsü jembia liasü.

Tuensang Town Council ajanga sorkar nem treatment plant cum dumping ground yanglutsü benoka aliba iba senden nung jembia aser tekeratiba nung mapa kuma aotsü asoshi lenmang bushitsü jembia liasü.

"Ni Greater Tiplaland atema inyaker, tangari Tamil Nadu nungia CM anir arutsü akok" - Pradyot Maniky



Northeast nung BJP tashi den tokteptsü atema political inyakyim tasen ka tenzükogo. Iba teloktep nung The Indigenous Progressive Regional Alliance (Tipra) aser Assam Jatiya Parishad (AJP) mezüing denogo saka tenüing mejalok lir. (Guwahati, September 7)

Guwahati, September 7, 2021 (Agencies): Tripura chuba jabaso aser Tipraha Indigenous Progressive Regional Alliance (TIPRA) chairman Pradyot Bikram Manikya DebBarma-i Assam Jatiya Parishad (AJP) den ajuruteptsü aser sentong ka nung adentsü atema Guwahati-i aruogo.

Northeast nung regional party ajak longjemer sabang ka tentettsü aser lisopurtem indang maitsü aser akhüm atema inyaksü nükjidong nung AJP-i iba sentong ayongzük.

"Onoki Greater Tiplaland atema alizüing yuogo aser iba ya Indian constitution kübok lir. Taoba küm 70 tashi Tripura nung lisopurtem kanga timtemogo aser Citizenship Amendment Act ajanga khuret tuluba ajuru. Assam aser Tripura ya linük nung tanga

tesemtem dang nungi balaka ta loktepogo aser iba ken o ya Supreme Court nung mangadang lir" ta Pradyot Manikya-i ashi.

"2026 nungi delimitation tenzüksü. Asenok iba tashi nung melongjem lira asen nübör asoshi kecha manüingsü aser Tripura nung lisopur ajunga samatsütsü" ta Manikya-isa metetdaksü.

"Tripura tanga ka maginüra regional party ajaki Tripura nung yaritsü mepishir" ta paisa ashi.

Manikya-i Assamese nung nem tenüingsang agütsüba sayua Tripura nung Assam nung Ahom commander Lachit Borphukan indang kürakyanglu ka yanglutsü nangzük.

"Tanga political party temi onok den tesentaktep yanglunüra, party nungi

takangba onüktem tezüluba nung agütsüsüla" ta Pradyot Manikya-isa ashi.

Paisa Bharatiya Janata Party national General Secretary Dilip Saikia den jembishinü kecha masü aser pa den kodang majurutept ta ashi.

Tripura nung Sushmita Dev nem Chief Minister inyadaksütsü atema Trinamool Congress-i sentong renema lir asü ta osangbeneri asüingdang "Ni ozü limaer nübortem indang greater Tiplaland atema inyaker. Tanga teloktemi local tanishir melira Tamil Nadu aser Maharashtra nungi Chief Minister anir arutsü akok aser iba atema ni khuret kecha mabener. Iba ya India aser nisung ajak temeten lir" ta Manikya-i langzü.

"Ita 15 dang anünga lir anungji onok merangtsü" ta paisa shisem.

Manipur CM anema wako tanak amshia lungkak ait

Guwahati, September 7, 2021 (Agencies): Churachandpur district nung Manipur chief minister N Biren Singh anema 'black flag' lungkak aitba sentong ka agi.

Chief minister Biren Singh-i Peace ground, Tuibong nung 'Go to Village 2.0' scheme tenzüksütsü atema aodang Churachandpur district nung kaketshirtemi anir nisungtemi pa dak wako tanak ayiploksü.

Manipur state sorkari lisopurtem asoshi mapa shitak meinyaksüba atema tejashi sayua parnoki chief minister anema black flags aser posters amshia lungkak ait.

Lungkak aiteremi "Go Back Biren", "Pass the Bill & Come", "Stop playing with our

sentiments", "We stand against the unconstitutional inclusion of Valley MLAs in HAC", "Article 371-C is the ambassador for Hills & valleys relationship, honour it", "We want HAC amendment Act 2021 passed" ta zülua aliba poster tem amer lungkak ait.

Deobarnü Churachandpur district nung kaketshir telok kari Hill Area Committee (HAC) bill magizük tashi Manipur sorkar den amalitep malitsü ta osang metetdaksüogo.

Parnokisa Manipur Legislative Assembly Speaker dang Hill Areas Committee nung valley MLA 9 dendaksütsü tetuyuba agütsüba meyipa agientsü takhangba agütsüogo.

Ratan Chakraborty-i Tripura Assembly Speaker inyaksü akok



Ratan Chakraborty (File photo)

Agartala, September 7, 2021 (Agencies): Tripura nung kümsük asemen tashi MLA inyaker Ratan Chakraborty-i Speaker inyaksü akok.

Taoba hopta Tripura Assembly Speaker Rebatu Mohan Das-i mapa nungi anena liasü.

Chakraborty ya 2017 küm BJP nung aden aser 2018 assembly election nung pa Khayerpur constituency nungi takok angu. Taoba Congress-i aniba sorkar nung pai minister inyakogo.

BJP central lennirtemi

Chakraborty ajungkettsü atema telemteba agi. 2023 assembly election matongdang central lennirtemi Sorkar aser party akangshitsü atema inyaker.

Chakraborty ya o jembir tajung ka lir aser taoba Tripura Chief Minister asür Sudhir Ranjan Majumdar den külemi Trinamool Congress nunga aden saka 2002 nung pai tanaben Congress nung züingsem aküm.

2017 küm TMC nungi BJP nung adensang Deputy Speaker Biswa Bandhu Sen-ia Speaker inyaksü atema kanga meranga jembidar ta osang angazük.

Meghalaya Congress-i Assembly nung Chesterfield tepsetba onük benoktsü

Shillong, September 7, 2021 (Agencies): Meghalaya Congress-i Assembly session nung taoba HNLC tanishir Chesterfield Thangkhiew khasetba indang onük benoktsü.

September 10 nungi Meghalaya Assembly session tenzüksü sentong lir.

August 13 nü Meghalaya

police den khatetpdang taoba HNLC tanishir Chesterfield Thangkhiew khaset.

Iba tatalokba atema Meghalaya sorkari bushisüingdang tenzükogo.

Meghalaya Congress-isa Assembly nung Metbah Lyngdoh mapa nungi agientsü atema resolution ka benoktsü telemteba agiba osang

metetdaksüogo.

Iba resolution nung Meghalaya Congress MLA tem- Zenith Sangma, HM Shangpliang, George Lyngdoh aser Kimfa Marbaniang nungertemi sign süa lir.

Parnoki Meghalaya Assembly indang commissioner & secretary nem resolution ji agütsüogo.

**GOVERNMENT OF NAGALAND
DIRECTORATE OF TECHNICAL EDUCATION
NAGALAND: KOHIMA**

NO. DTE/MIN/4/2013/MIS Kohima, dated the 6th September, 2021

NOTIFICATION

This is to inform the student(s) who have applied for Merit-cum-Means based scholarship and Post-Matric Scholarship during the session 2020-21 under the Ministry of Minority Affairs, Government of India that the Ministry has provided provisions for the last time to change/update the account details of beneficiaries whose bank account validation had failed earlier. Affected students are advised to login to National Scholarship Portal using their Scholarship Application ID and Password and update their bank details at the earliest.

(NUNGSANGMENLA IMCHEN)
Ex-Officio Director.

Issued by DIPR

Myanmar nung ka dena heroin shibelener 4 apu

Aizawl, September 7, 2021 (Agencies): Mizoram Excise & Narcotics department aser Assam rifles sepaitemi Rs 19.60 lakh alang heroin gram 700 tema puogo.

Iba dak sendakba nung parnoki Myanmar nung ka dena nisung 4 puogo.

Osang tejangka ka angazükba nung ajemdaker Excise department aser Assam Rifles indang Field Intelligence Unit (FIU)-i Zarkawt tesem mita aodang mozü shibelener nisung asem ket nung heroin apu.

Par asemji Lalropianga (38),

Lalneihnsanga (40) aser Lalsiamthara (21) nung ka jangjaogo aser parnok ajak Champhai jila nung alir.

Ano, Excise and Narcotics department ketdangsurtemi Bawngkawn tesem nung heroin gram 77 apu.

Iba atema Khawimawi nung Lalvulliani ta ser nisung ka apu aser pai bena aliba heroin ji Rs. 2.10 lakh alang liasü.

Parnok ajak Special Court (ND&PS Act) dangi anir oa ken o benokba sülen Aizawl Central jail nung puokogo.



TIR YIMYIM YIMOBILEM (EDITORIAL)

DIMAPUR RASEMNÜ, RONGJUI (SEPTEMBER) 08, 2021

Inyakerbo tali, teinyakmongbo maka

India telongjem kübok aliba state-tem rongnung alinük tasazük aser nütsüng yongsük den apitepdangra, Nagaland state nungsa government mapa inyaker teimtiba saka ano nübertem tenzükba mapa nungbo tamajungertem rongnung züngsembaji Nagaland state ya lir. Nagaland nung nütsüng yongsük ajak agi lakh 20 shi lir aser lakh metsü nung jagi Naga nungger masüba purtem aser ano nisung kasa ser nung tesem ana asem nung zülüokbatem endokra, Nagaland nung Naga nungger yongsük shitakbajibo lakh 15 jung mejung ka asütsü. Item rongnungji tang Nagaland state government nung ita sen achir, mapa inyaker masü, nisung ajak agi lakh ka ser meyrirjang metsü (1,20,000) shi lir. Tetezü Nagaland nung Naga nungger nisung ter ana shia state government mapa nung ita sen achir nisung kaka lir. Iba jagi Nagaland nung alir Naga nungger tem ya kecha meinyakyonga chiyonga jema taküm litetter aser kecha meinyak chiyonga jema aliba agi, Naga nungger tiembaka tebok chizüker, pei nuk agi pei tetsüng mangu aser pei tsüng agi pei mang makok mejua mejua senzüya angutsü. Atangji, Nagaland government mapa nung inyaker lakh ka ser meyrirjang metsüpronglaji shitakba mapa inyaker nisung tenüngtembo masü, kechiyong department nung tulurtem angati ita sen agizüka agitsü asoshi shimba nisung tenüng tiyazü meyrirjang aika alitsü. Iba jagi department kar nungbo pei ita sen dang nungibo tiyazü ita sen-ang teimba agizüka kidangi bener arur. Naga nungger asoshi tesüngmangtsü temoatsüji aji ka lir aser atangji India nung asenoki inyaktetba tesüngmangtsü takok mapaji taila (bogus) mapa inyaker aika tenüng nung ita sen agizüka chitetba mapaji lir. Iba ama mapa ya Olympics nung asaya ama ka toktep asübo, Nagaland-ia hon agi yangluba konang bener arutetla aser NITI Aayok purtemia tematiba takok jenjang agütsüla. Nagaland nung taila ita sen agizüka achiba nung toktepbaji aji tatem masü, saka ano nisung kasa saka department ana asem nung inyaka ita sen agizüktetba nunga Nagaland adoktsü aser pei melen ita sen tesadang ka agütsür tangar inyakdaksüba mapa nunga Nagaland-isa tematiba jenjang angutsü. Ibai tamamangtsüka saka shitakba Nagaland-ji aji lir. Iba ama toktepbaji nung Nagaland temaba jenjang nung adokba osang ka NITI Aayok metetdaksüba, Northeast state-tem rongnung nübertem taküm jenjang tajungba kümdaktsütsü asoshi inyakba mapatem nung Nagaland-i tamajungba inyakba osang metetdaksüba asütsü. Ano asenoki manganütsüa akok saka Rights & Risks Analysis Group-i dena Nagaland government-bo telongpur telok kübok aliba aser opposition maliba government indang süngmanga metetdaksüba ajakji asenok jak nungsa asenoki anak palokba ngua tangari menütsüba mapatem asütsü. Atangji, alima tashitemet inyakim ya kanga karaa melenshia aor asünungji, joko asenok ama mashilen nungi government mapai alirtem, tiyazü nisung tenüng nung ita sen agizüka achirtem aser department ana asem nung ita sen chia alirtem, akhidang amato masü saka kanga mesadem kümdagi. Joko, Nagaland nunga government mapa inyaker tem shia pei Aadhar number meshia government ket nung ayutsü tenzükogo. Iba jibo computer ajanga dang inyaksü asünungji kasa Aadhar number amshia kasa nisungji mapa ka dak tali nung meitetsü. Ano, taila nisung (bogus employees) government mapa nung züngoka alirtema meinoktettsü. Iba maparen tenzüküer külen department aika nung inyaker aika ajemadokba osang angazüker. Aji Nagaland yanglushi tenzüküer asütsü. Ajsüka, tang Nagaland government mapa nung küm aika tiyazü nisungtem tenüng nung ita sen kati agizüka agili, ano ka nem melenoka yutsüli ta ochimashi mapa temoatsü amai agia arurtem dak to kechi inyaksü? Asü, aji Tsüngrem nem dang nungloktsütsü? Küm aika nisung kasai deparment ana asem nung ita sen agia aruba putettertem nema kechi temerenshi agütsütsü? Asü, aji Tsüngrem nemsu agütsütsü? Nagaland government kübok ita sen achir teimtiba aliba department-temji Police, School Education aser NPWD lir ta angazüker. Ajsüka, shitakba anogo shia police mapa shitak inyaker Nagaland police kwi alitsü amai bilemer. School Education department nunga shitakba anogo shia pei ataba kaketrejui oa kaketshirtem dang sayur kwi asütsü amai bilemer. PWD nunga inyakerbo aika saka PWD nungbo inyaker tema mali ama PWD lenmang arem akümba ya koda? Iba ama tim masüba mapatem inyakba nungi Nagaland nungbo department shinga jenbua malitsü. Ajak ita sen achir saka mapabo teinyakmong maka, terenlok mapa inyaksüba sen dena lema agir ta asüba state-ji shitakba state masü, ibaji taila state nung tiyazü sen agi asüng tangar keti aotsüba rongsen bendener adenshidak aliba arem tapu ka asütsü. Joko, iba arem nung jagi adoka nisung nüchi jak dener shitakba Nagaland tasen ka kuma alitsüla.

OLEMSABANG AOR AJAKI AO OSHI ASHITSÜLA

~ Temsüwati Kichu (Osang zülur)

Kin ka asoshi pei kin oshiji kanga tongtipang, iba oshi nungji tajung aika sendaka lir. Pei oshi mejembira iba kin nisungtemji liaka kin ka ta asübajibo aika samaa oadoker. Tangar lima nung aji taloka arudar. Oshiji kati ka den angatettepa jembiba kisüng masü, oshi jagi peiji shiba aji sayur, oshi ajanga sobaliba tajung mesamadaktsü benshitetter, oshi ajanga temeimtep aser telongjem adokdaksür, oshi jagi nübertemji kin ka ta lidaktsür. Anungji asen Aor ajaki Ao oshi ashitsüla. Asen Ao kin asoshiAo oshi ya Aor ajak külem meyong, Ao kin songjem senmang rongnung tulutiba kaji Ao oshi ya lir, ya asen ayak. Kodang oshiji wazüka Aor ajaki Ao o jembidir, idangji oshi ajanga kechisa ajangzüküer itemji asen Ao kin meyong asütsü.

Tanü Ao oshi (Jungli o) kong lir? Kechi tia nung lir? Kechiba kara mainer?

1. Aori Ao oshi mashiba ya tanü asen Aor tebilemstü khuret tulutiba ka kumogo. Talisa lanur aikati Ao o mejembitetter, aji tsüraburi kidang mesayuba mesüra mejembiba agi asütsü akok, ano karbo tanga len azünger, mapa inyaker ta asüba agia asütsü akok, kuli aika lir. Kari anarongteta jembitetaka azüngtsü mesüra zülutsüji parnok asoshi kangasa tasak. Lanurtem aika yamaji lir. Süra tarutsü nung koda tebilemstü tulu asütsü.
2. Tanurtem karbo Ao oshi jembitsübo toktsür pei yim tenünga meshitetba lir. Tebu na koyimer ta asüngdangdang, "Ni Ao yimer" ta langzü. Tatalokba yamaji lir. Ano kenü kati "Ni Jamir yimer" ta ashi. Katibo na kechi yimer ta asüngdangdang, "Ame Naga ase" ta langzü. Aor Ao oshi iba jenjang nung lir. Alima nung oshi samaa aotsü asadangba rongnung Ao oshia dena lir ta asadangtetba ya koda asangsang!
3. Ao o mejembitet yonga kecha masüEnglish Hindi jembitetterbo aji agi tangar meneptsüta tangatetba akaba Aor rongnung lir. Hau, mapa kar inyaksü atemabo tanga oshi junga ashibaji tajangzük aika lir. Anungji tanga oshijia angazüktsüla. Ajia kanga tongtipang. Saka pei oshi mashiba tebilemstü aika lir. Tazüngbabo kanga lir, kanga dang sempet tajung, saka pei oshi mashi nungji yimer Aor atenshidak tejak metentetter, Aor lokti nung shilem magitetter, Aor sentepdaki maruner, Ao o angazükdi ta asünung joko tain kumadoker angazük tasak. Sasar, saka tsüraburi mesayutet.
4. Ao oshi mejembitetter mezülutetter, saka Nagamese, Hindi, English yamala jembitetbajiang khonang amai bilemer. Ajibo tamashi aser maksü.
5. Ao o nung kaket adokba karbo ashishiteper aser mayoktsü ozüng tesashi agütsür. Yamala nokdangba ya bulura, iba jagi tezülur tezütangdaksür aser oshi merenloker. Tera aibelena zülura timi metongshitsür masü mesüra tim yimya agi langzür masü senchiang achir. Karibo ashir, kaket zülunüra tamasa ak farm ka lapokerang zülutsüla. Aji asayaa ochi ashiba ka ta angatetter.
6. Zülumen liromedem masüba tebilemstü ya kanga tulu. Zülumen medemstü asoshi tesayubanübur nem agüja aruogo. Aji kanga junger saka ano teinyaktsü tulu ka lir. Olasü, osü, oren yangluyim yamala ya yim mesüra tzükong balalaji balala aika lir, saka kodang tezüluba dangi arudir, zülumenbo liromedema kasa dang asütsü nungdaker.

Asen Ao oshi indang senso ajaki tebilemdangtsü kar yamai

1. Pi tangar kinbo Naga nungger rongnung "Tenyidie" oshi nung Ph.D tashi agiteter. Asen Ao oshi küm aika jakdang nungi asen Naga nungger kin aikati jembia aru, tanga jembidar. Naga nungger oshi rongnung Ao o ya tangar kina den nisung teimba jembir rongnung ka asütsü, mesüra teimtibia asütsü akok. Süra, kechiba asen Ao oshibo academic nung tangar ama masü? Süoki ia shisadangdi.
2. Ao lima nungbo bazaar nunga tanga oshi masü Ao o jembidaktsü nung Ao oshi renloka aotsü. Aji takoktsü asüng masü? Ataloktsü atema kechi inyaksü nungdaker? Garo nunggerbo bazaar nunga Garo dang jembir, tzümar sünga Garo mejembira business meinyaktetter.
3. Toklang tenzüküer Ao Arogotem nung inyaksü bushidang Ao o jembitetba aser zülutetba yaa tetendangba rongnung ka sädaktsütsü koda. Tenzükera aika jembiba, züluba nung renloktsü nungdaka lir. Ano Ao Senden nungi tenzüküer Aor lokti tentet balala nung lenir asütsüshim dang temetetba aser tazüngba tulu liaka Ao o mejembitetra meshimtsü ta renemtsü koda?
4. Pei yimeri amshiba ojang mesüra peii o tasen ka shisatet nung ibaji dang shitak ta ajaki aji amshidaktsünüba, tekong meranga iba asoshi nokdakba, züluba, jembiba yamala jakla ajanga ojangji ajaki meima kümdaktsür masü meyipier asen oshi junga telong mekümdaktsür. Yamala ajanga meputep aser telemsa taliang adoker masü no? Kechiba peii amshiba ojangsa amshitsüla mesüra pei tangatetbaji dang shidak ta asütsüla? Tebilemba balala süra, lenji arutepa ajuruteptsü lemjem lir masüna?
5. Asenok Aori talisajungli, mongsen, changki item otemjembir, ano yim balala nung jayajako, jembiren, aika nung ojang balala lir, yim ka telungtet nunga asüng mepu balala nung balala alitsü akok. Saka item ajanga ya telemsa masü Ao oshi ya item ajak nung jagi tapet bendena oshi takar kümdaktsütsüba takoktsü. Iba ama o aika balala aliba ya oshi takar akümstü asoshi tzüpokdak ta angateta inyaksü koda? Ano tangar oshi nungia apua amshitsü koda? Ao o nung tzümar o English o aika enoker jembidar. English ojang aika tanüalibaya repringdangra tangar oshi nungi agizükba lir, ano tanga ojang tasen English nung bendenlokdar. Asenoka Ao ojang teimba akümstü asoshi kong nungi kobasa bendenloktsüla?
6. Clark Theological Collge nung Ao oshi agi C/DipCS, BCS, MCS, D.Mn, BD agitetsüsa inyak nung koda? Theological kaketter, Bible Dictionary, Commentaries Ao oshi nung meyipzüktsü, ano Aor Theology azünger züluba thesis pei university nungi temelaba agia Ao oshi nung meyipzükamshitettsü.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Wales nung Arogoi kasa o kasa kibong akü mertem moatsütsü



Church in Wales' Governing Body senden amendang tangokba noksa nung angur.

September 07, 2021: Wales (UK) nung aliba Arogotemi kasa tetsür o tetsür na mesüra tebur o tebur na kibong kümer alirtem moatsütsü atema vote agütsütepa bill ka agizükogo.

Hombarnü (September 6) Church in Wales' Governing Body senden nung vote agütsütepa iba bill ji agizük, ajisüaka Arogo nung kasa tetsür o tetsür na mesüra tebur o tebur na kibong akümtsü atemabo memelatsü.

Taruba küm pongu tashi tendanga kasa o kasa kibong akü mertem Arogoi moatsütsü, ajisüaka parnok ama kibong akü mertem moatsütsü atema sentong agütsü mesüra magütsü jibo putirtem melung südaktsütsü.

Church in Wales' Governing Body nung züngsemtem asemsü nungi anasüi vote agüja iba bill agizüka liasü.

Newport nung anogo asemnü International Convention Centre Wales senden mezüng anogo nung iba bill atema o toktepa liasü.

St. Asaph nung putir,

Gregory Cameron-i, "Iba onük nung o toktepa nungi ni tepela mangu, ajisüaka Wales nung Arogoi Tsüngrem kübok kasa o kasa kibong akü mertem atema tim inyaktsüogo, ta bilemer. Tanü Arogoi parnok ama kibongtem moatsütsü atema jembio. Tarutsü nung teinyaktsü aika lir, ajisüaka Arogo kongsang balalai longjemer inyaktetsü ta ni amanger," ta paisa metetdaksü.

Okila jembidang putir, Andy John-i, iba telemtetba ya Tsüngrem O nungi pilaba lir ta karibo ashishitsüa akok, ta metetdakja liasü.

Iba bill agizükba sülen Liverpool nung putir, Paul Bayes-i twitter ajanga, "Iba ya telemtetba tajung ka lir. England nung Arogoi England atema mission yanglushiba ama Wales nunga Arogoi Wales atema mission yanglushir," ta metetdaksü.

Church in Wales' Governing Body senden nung putir 28-i iba bill agizük aser putir 12-i iba bill anema vote agütsü.

Yaküm Church of England-i

iba ama bill ka magizüki liasü, tang Church of Scotland nunga iba ama bill ka agizüktsü atema jembidar aser Church of Ireland-ibo kasa o kasa kibong akü mertem Arogoi memoatsür.

Taküm June ita nung UK nung Methodist Arogoibo tetsür o tetsür na aser tebur o tebur na kibong akümtsü melaogo saka Ireland nung Methodist Arogoibo, kiyimba ya tetsür aser tebur na tsüngda dang asütsüla, ta metetdaksü.

June ita nung UK Methodist Conference nung 'kibong akümba teratet' melenshitsü atema vote agütsütepa aser kasa tetsür o tetsür na, aser tebur o tebur na kibong akümtsü melatsü atema vote 254 agütsü aser ibaji anema agütsüba vote bo 46 dang liasü.

Taküm May ita nung Ireland nung Church of Scotland aser Mother church of the Presbyterian Church natibo pastor tem aser deacon temi dang melungra kasa tetsür o tetsür aser tebur o tebur na kiyimba kulizüng agütsütsü akok, ta metetdaksüogo.

Hong Kong nung Pastors Network anen; Khristan lenir aika jenshiogo

September 07, 2021: 2019 küm Hong Kong nung democracy pusemertemi longkak sashia aitba nung ajemdaker yaküm June ita nung China-i Hong Kong nung National Security Law (NSL) benoka liasü, ta International Christian Concern-i metetdaksü.

Hong Kong nung rongsenkettsüng terenlok aser yimten tashi itta alitsü nükjidong nung NSL ozüng kübok sorkar anema nokdakertem nem temerenshi agütsür; ajioda iba ozüng benokba sülen yimten lenirtem, osangbenertem, meimchir temeden atema inyaker aser kentenerem aika iba ozüng kübok aitsüogo.

Iba ozüng kübok tang tashi nungbo Hong Kong nung Khristantem anema meinyaker, ajisüaka democracy pusema jembir Khristan lenir aika tanga linük

balalai jenogo. 2019 küm Hong Kong nung longkak sashia aitba sülen Hong Kong Pastors Network (HKPN) tenteta liasü aser parnoki China sorkar aija "Gospel Declaration" adoka liasü, ajisüaka iba telok anener, ta September 2, 2021 nü parnok indang Facebook page ajanga metetdaksü.

Hong Kong Pastors Network-i, "Tang Hong Kong nung tensa tamajungba akümer, lokti tentettem aser labor unions-i tetsübu nung telok anenadoker, yamaji onokia iba tentet anentsü atema telemtetba agiogo. Onoki joko Facebook page nung osangtsüsang melemsateptsü saka iba page bo mindoktsü," ta metetdaksü.

"Tanelar tongbang ya asen taküm nung maneni raratsü; Hong Kong adener aliba Khristantem aser pastor temi maneni Hong Kong nung

rangloksü aser osangtajung proktsü," ta metetdaksü.

HKPN anenba dak sendakba nung osangbener den jembidang taoba mapang Hong Kong Christian Council nung Chairman aser tang China Aid nung teinyakdak, Rev. Yuen Tin-Yau-i, HKPN nung inyaker aikati Hong Kong toktsür ogo aser tang anünga aliba pastor tem atema teinyaktsü mapa jenti lir, anungji HKPN mission maneni inyaktsüji tamakoktsü, ta metetdaksü.

Yaküm August ita nung HKPN nung otongdar pastor ana- Wong Siu-yung aser Yeung Kin-keung nati, tena mejangjaba tesem kati jena ogo, ta metetdakja liasü.

China sorkar pusemba osangkakettem nung, "Pastor ana ya China anema nokdakertem lir," ta sangdongba sülen pastor anati Hong Kong toktsür ajen.

ANOGO ABEN TSÜNGREM DEN

Chuba putirtem

Nenok teshimetetba kin, chuba putir telok, temeshi kin, aser Tsüngrem pei agütsü purtem nenok lir.

1 Peter 2:9

Na Khristan ka, süra na Tsüngremi shimtetba putir ka lir. Chuba putir ka ama na maneni chuba dangi aotsü leman lapokja lir. Ne taküm nung nüngdak adokra, na atema tetsüngdai air putir ka bushitsü menüngdak. Na chuba putir.

Aji oda süaka putira, pa mapa lir. Putir inyakyim kübok putir kati putir mapa inyaktsüla. Laishiba nung putir kati kija inyakyim amshitsü shia mali, pa balaka tenzükba mapa mali. Putirtem külemi mapa inyaker (Lev. 9:1). Lairen masüba kija mapaji Tsüngrem putir kübok pai bilemba mapa nungi pilatsü akok.

Nübur matsüngdang putirji Tsüngrem melen noktakba lir, saka pai ano Tsüngrem dangi nübur tebilemba abener. Na meketa kar Tsüngrem dang mepishitsütsü putir sarasadem nüngdaka lir asü? Karbo ne taküm nung Tsüngrem angu nung dang Tsüngrem metetta arutsüba alitsü akok. Khristaji shidakba taküm lir ta panübur taküm agi sayuba alimai nüngdaker. Tsüngremi ajaba dang nungi asen mapa temaba südaktsübaji lendong lir. Asenok mezüngbuba putir asütsü aja, aser tanabuba mapa ka nung sotdaktsü aja. Kodang asenoki ibai meinyaklir asen meketa alir ajaki asenok ajanga Tsüngrem dangi aotsü songtemtsü. Tsüngremi secular mapa kati ajatsü akok, saka iba dang nungi talisa na Pa putir ka asütsü shimtet.

Arogoi Pakistan Khristantem aser Afghan refugees anepalutsüla

September 07, 2021: Tang ama tensa ka nung Pakistan linük ya minorities, Arogoi sorkar aser melungtet talisa Khristantem alitsü telok balala den tesendaktep majungba linük ka lir, aser yanglushir timtemertem aser nungdakbapurtem yaritsüla, ta refugees aika Pakistan-i jena pai ashi.

arudar, anungji Arogoi sensakertem aser Tsüngrem mezüngmeshiba timtemertem atema kishi ozüngtem nung ajemdaker lapokja parnok anepalutsüla, ta Khristantem anema inyakba New Jersey nung aliba tatalokba aika lir. Pakistan hospital ka nung Chaplain, nungsa Khristan tsürtem puer Naem Harry-i metetdaksü. oor kangshia Islam yimsü dangi meyipdaktsüba sülen

Rara ajanga jena arurtemi tejenokdak dang masü saka Muslim nung den kibong chiyungtsü den tanelar küm daksür. chiyungtsüa nüngdaker, ta pai ashi.

Mathi tapu 25 nung Yisu ayartem nem chiyungtsü agütsütsü aser tzürartem nem tzü agütsütsü atema shia lir, aser Isaiia tapu 40 nunga 'ozü nüburtem melung süngzükjang' ta shia lir. Anungji tang mapang ya Arogoi timtemertem aser nungdakbapurtem anepalua yaritsü mapang ka lir.

Pakistan nung Arogoi Afghan refugees timtemji jungjunga angatetsüla aser Pakistan nung Khristantem timtem angatetsüla. "Reshikangshi ajangshirtem aser teyari nungdakbapurtem atema Pastoral counseling centers nüngdaker. Arogoi tajungtiba agi parnok anepaludar, ajisüaka iba dak nungi tali awa-a oa inyaktsüsa mapangi bener arutsür," ta paisa metetdaksü.

OLONG PAITEP # 5930

1				2					3	
						4		5		
6			7							
					8		9			10
11										
12		13					14			
		15								
						16				
	17									
					18					

TIPILEN		LANGTSÜNGLEN	
1. Yakob tetsü - (6)		2. _ _ _ gki - (3)	
4. Mezüng nisung - (4)		3. Telungpur telok ka - (2)	
6. Tasen lai kakat ka - (5)		5. Tsüngremi mezüng poktetdaksüba - (5)	
9. Au lanu - (2)		7. Tia - (4)	
12. Tejen lai 21 buba - (11)		8. Yakob-er jabaso ka - (5)	
15. Tekolak tembar - (2)		10. Abraham tebutsü - (4)	
16. Zütsüra anepsang - (5)		11. Rebeka kinungpu - (4)	
17. Kain tenu - (4)		13. Esau tenu - (5)	
18. Hana-er jabaso - (6)		14. Tzünglu tilala aru - (4)	
		16. Jafet tebu - (3)	
		17. Teka agi kongshi - (2)	

OLONG PAITEP # 5929 TELANGZÜBA

TIPILEN :	LANGTSÜNGLEN :
2. Pongsen, 5. Lepko, 7. Omen, 8. Maongka, 10. Yangkhu, 12. Senpong, 14. Angu, 15. Raksa, 16. Arameso,	1. Alimang, 2. Pongen, 3. Samaru, 4. Nün, 6. Pio, 9. Nüngdak, 10. Yongya, 11. Kongro, 13. Ora, 14. Ata.



ALOKBA EXAM NUNG MARK JUNGA MANGUR :

Tebu : Kwa talak , nenok first term exam indang progress report ngur na?

Alokba : Hau oba nguogo.

Tebu : Kwa obalai repringdangdi.

Alokba : Oba kü temba Sobangba nem khen bener yokogo.

Tebu : Waa, nü indang progress reporta sa pi nem bener yokker? Kechi atema?

Alokba : Kü temba tebu tamasa khen aoksadaksüdi ta bener yok ati.

Tebu : Oh Alokba!

Lilir : WhatsApp

TANÜBO NAI LANGZÜANG

Q. Koba küm International Day of Charity sangdong?
 A. 2010 B.2011 C.2012 D.2013

===== (Taruba adok nung onoki langzüsü)

YASHI ADOK TELANGZÜBA : Sanjeev Singh

AO OSHI ANGAZÜKDAK:
TANÜ ANGAZÜKTSÜBA OJANG

Kutok
 (v) long mesüra süng maginüdak endokba (cut off)
 * Yimdong nung long tuluka liasüba **kutoka** endok.

Kübok
 (v) tetsünglanglen (below, under)
 * Lenmang **kübok** ozü ki lir.

NAI-A YA METETTER MA?

INDIA NUNG NÜBURTEMI SAPUA ALIBA GARITEM: AUGUST 2021

OEM	Model	Aug' 21 Sales
- Maruti	Baleno	15,646
- Maruti	Alto	13,236
- Maruti	Vitara Brezza	12,906
- Hyundai	Creta	12,597
- Maruti	Swift	12,483
- Maruti	Eeco	10,666
- Tata	Nexon	10,006
- Maruti	Wagon R	9628
- Kia	Seltos	8619
- Hyundai	Venue	8377
- Hyundai	Grand i10 NIOS	8023
- Kia	Sonet	7752
- Hyundai	i20	7340
- Maruti	S-Presso	7225
- Honda	Amaze	6591
- Maruti	Ertiga	6251
- Tata	Altroz	6175
- Mahindra	XUV300	5861
- Toyota	Innova Crysta	5755
- Maruti	Dzire	5714
- Tata	Tiago	5658
- Renault	Triber	3912
- Mahindra	Thar	3493
- Hyundai	Alcazar	3468
- Honda	City	3284

*OEM - Original Equipment Manufacturer

SUDOKU # 5971 TELANGZÜBA # 5970

	7	8				5	1	2	7	8	4	9	3	6	5	1	
6		4		5	7	3			6	1	4	8	5	7	3	2	9
					6		8	7	5	9	3	2	1	6	4	8	7
		6		2	5				8	4	6	9	7	2	5	1	3
		9			8				1	2	9	5	3	4	8	7	6
			1	6	8			2	3	5	7	1	6	8	9	4	2
	3	1		4		2			9	3	1	7	4	5	2	6	8
4		2	3			7			4	6	2	3	8	1	7	9	5
7	8			2				4	7	8	5	6	2	9	1	3	4

OJANG LUTEP # 5516

IMALAR :

NGSROEN :

NDE :

TGRESÜNMER :

HITAOC :

EASR :

EIMTEM :

NYONKHEGI :

MDANGTEDEMSÜ :

KOMAK :

OJANG LUTEP TELANGZÜBA # 5514

**TEMOATSÜ DEN ANEMA ASER ARISHIA ALIBA
 AJAK TSÜNGREM NUNGI LIR**

TAN HOPTA ATEMA - KOMA SÜLA ?

Q. Nagaland angh R.N. Ravi ya melen nunga koma süla ?



Prayagaraja kübok Swaroop Rani Nehru Hospital nung registration counter nung nüburtem nongtepba noksa nung angur. Corona wara pokteter aliba tialong nung Uttar pradesh kübo tesem ka nung Dengue tashidak agi nüburtem kangshitedar.

Rahul Gandhi AICC tir kümdaktsütsüla: Youth Congress

New Delhi, Rongjui/ September 7 (Agencies): Indian Youth Congress (IYC) national executive conclave September 5 aser 6 nü amenba mapang All India Congress Committee (AICC) tir Rahul Gandhi kümdaktsütsü atema bangjemogo.

Conclave tatembangbuba anogo iba bangzüng ya agizüka liasü. Iba senden ya IYC national tir Y Srinivas aser in-charge Krishna Allavaru na lenisüba nung amen aser IYC-i ashiba agi, lenirtem rongnung Gandhi-i dang India nungertem ken o tasü ita jembir.

"Lenirtem rongnung Rahul Gandhi-i dang India nungertem tebilemtsü tasü ita jembir aser IYC-i Rahul Gandhi AICC tir kümdaktsütsü bangjemogo," ta bangzüng nung shia lir.

Kasa mapang nung IYC-i, Bharatiya Janata Party (BJP)-i

aniba sorkar inyakyim meshidakba indang nüburtem nem metedaktsütsü atema linük ajunga nung padyatra ka ayongzüksü bangjema liasü.

"Mapa manguba, oset jenjang ajungketba aser aluyimertem ken o, koba centre nung BJP-i aniba sorkari yimsüsüba mapang tali kümogo, iba ya ngua IYC shisabulur aser jashia bilemer," ta parnoki ashi.

"National security lendongbang nung lir aser tang tashi nung India nungertem litsü 1000 sq kms China nungerti ozüng alema atsüngba aser Pakistan-i tashi amshiba ajangshia mali. IYC-i, China nungerti ozüng alema India nungertem litsü atsüngba anema nokdaktsü bangjemogo aser India nungertem litsü tanaben meyipa agitsü akhangba den nüburtem nem China aser Pakistan nungertem sepaitem

nükjidong metedaktsütsü," ta parnokisa ashi.

"BJP-i national monetisation pipeline ka sangdongogo, koba tanga kecha masü saka linüki küm 70 tsüngda yangerba grand Indian closing sale ka dang lir. IYC-i iba yokyayokji anema lendi nungi Parliament tashi raratsü bangjemogo," ta parnoki ashi.

"Centre sorkar inyakyim meshidakbatem metedaktsütsü atema Indian Youth Congress züngsem ajaki linük ajunga nung padyatra sentong nung shilem agitsü," ta IYC-i ashi.

Iba senden ya Goa nung mena liasü, kong P Chidambaram nungertem amala lenirtemi shilem agiogo. Chidambaram ya taruba küm Goa assembly election atema renemshitsü asoshi party nem teyari agitsütsü atema Goa-i oa lir.

PM Modi-i Vidyanjali portal amenoktsüogo

New Delhi, Rongjui/ September 7 (Agencies): Ato Kilonser Narendra Modi-i Mongolbarnü education sector nung maparen balala tenzüksüogo aser ashiba agi, iba ajanga India tarutsü yanglushiba nung tongtibang shilem agitsü.

Video-conferencing ajanga 'Shikshak Parv' lapokba sentong nung o jembiba mapang pai, "linük nung education sector world-class kümdaktsütsü atema tesayuba aser tangazükba inyakyim ya mapangshia asadanga yanglushia alitsüla," ta ashi

Inyakyimtem rongnung Vidyanjali portal densema lir, koba school tem terenlok atema education volunteers, donors mesera CSR nem teyari agitsütsü atema lir.

Vidyanjali portal ajanga lokti/ volunteer tem nem parnoki shimba sorkari school aser school tem nem teyari agitsütsü atema sorkar den indang indanga sendakteptsü asoshi maongka agitsütsü.

Education ministry sangdong ka ajanga ashiba agi, India nungertem senso mesera India nung züngoksema aliba lokti tentet/ institution/company temi pei mulungka nung lenmang ana ajanga teyari agitsütsütsü.

Temulungertem service msera maparen balala ajanga teyari agitsütsütsü aser tanabuba nung civil infrastructure, electrical infrastructure, classroom nung amshiba osettem, digital infrastructure, saisapong, yoga, health amala extra curricular activities atema osettsüttem agüja teyari agitsütsütsü.

Iba portal kübok tang tinyakdak aser mapa nungi anener aliba tesayurtem, scientist/government/semi government ketdangsurtem, armed force mapa nungi anener alirtem, jurila mapa balala inyakertem, educational institution alumni tem aser nisung mashi kati teyari nüngdaka aliba school ka nem teyari agitsütsütsü.



Panaji kübok Azad Maidan tesem nung unemployment aser oset nung jenjang atuba anema Longkak aitba Congress züngsemtem dak police temi lathi agi azükba noksa nung angur.

India nung Covid-19 vaccine Crore 70 dak tema agitsüogo

New Delhi, Rongjui/ September 7 (Agencies): India nung tang tashi nung Covid-19 vaccine dose crore 70 dak tema agitsüogo, ta Union health ministry-i Mongolbarnü metedaktsü. Coronavirus ya samatsütsüla aser vaccine agiba ajanga takok agitsütsü, ta Union Health Minister Mansukh Mandaviya-i ashi.

"PM (Prime Minister) @NarendraModi lenisüba nung COVID-19 vaccine timba agüja odar. Tanü tashi nung vaccine dose 70,00,00,000 agitsüogo," ta pai tweet asü.

Paisa, iba takok asoshi

nüburtem aser health worker ajak nem tenüngsang agüja liasü.

India nung anogo 85 tsüngda vaccine crore 10 agitsü iba sülen anogo 45 lir crore 20 aser anogo 29 sülen crore 30 agitsü, ta Mandaviya-i ashi. Linük nung vaccine crore 30 agitsür aliba nungi anogo 24 tsüngda crore 40 ajung aser anogo 20 sülen August 6 nü crore 50 ajung. Iba sülen anogo 19 lir vaccine dose crore 60 agitsü aser anogo 13 dang lir vaccine crore 70 agitsü, ta pai Twitter nung ashi.

Linük ajunga nung vaccine agitsüba sentong ya January 16 nü tenzüik aser healthcare

workers (HCWs) tem nem mezüng agüja liasü. Yakbang nung inyakertem nem February 2 nü nungi vaccine agitsü tenzüik. Iba sülen COVID-19 vaccine agitsüba shilem tasembuba tenzüik, kong arishi küm 60 temapur aser arishi küm 45 temapur tashidak tanga agi tonger lirtem densema liasü.

Linük nung arishi küm 45 temapurtem nem April 1 nü nungi vaccine agitsü tenzüik. Iba sülen sorkari vaccine agitsüba sentong atsülangshitsü telemteba agia May 1 nü nungi arishi küm 18 temapurtem nem vaccine agitsü tenzüik.

Chhattisgarh CM tebu apu; judicial custody-i yokogo

New Delhi, Rongjui/ September 7 (Agencies): Chhattisgarh chief minister Bhupesh Baghel tebu, Nand Kumar Baghel-i Brahmin lokti anema jembiba atema Mongolbarnü Raipur nung local court kati pa anogo 15 judicial custody nung ayutsü yokogo, ta superintendent of police Prashant Agarwal-i ashi. Agarwal-i ashiba agi, pa okadaki anir aru aser tepuokdaki yok. Arishi küm 86 tain Nand Kumar Baghel-i Brahmin tem ya sentoka toktsütsüla ta shia liasü.

Ketdangsurtemi ashiba agi, Sarv Brahmin Samaj-i ken o benokba sülen lokti balala tsüngda tsükchitep adokdaktsütsü ajungmesoba atema CM tebu apu. "Indian Penal Code Sections 153-A (tamangb yimsü, shilu, tasoli, talidak, oshi dak ajemdaker lokti tsüngda tsükchitep adokdaktsütsü ajungmesoba) aser 505(1)(b) (lokti nung tetsübu adokdaktsütsü nükjidong nung inyaksangshiba aser iba ajanga state aser lokti

tesunep anema inyaksüsa ajungmesoba) kübok Nand Kumar Baghel (86) anema ken o ka benokogo," ta police ketdangsur tejen Ajay Yadav-i Honibarnü ashi.

Sarv Brahmin Samaj-i Chhattisgarh CM tebu anema ken o ka benok aser ashiba agi, Nand Kumar Baghel-i Uttar Pradesh nung sentong ka agiba mapang Brahmins tem sentoktsü atema nüburtem ajungmeso aser parnok dang bendangertem ta aja.

Chief minister-i tebu aitsüba sülen ashiba agi, nisung shinga ozü tema nung mali. "Arishi küm 86 tain chief minister-ba tebu süaka ozü sorkar kübok nisung shinga ozüng tema nung mali," ta Bhupesh Baghel-i ashi.

"Ni aniba sorkar kübok nisung ajak kasa dang. Nisung ajaki ni kübu den tebilemdangba balala aliba meteta lir. Yimden yimsüsüba tsütsü küna tangatetba aser tamangba balala. Par jabaso ama ni pa akhümtsübur saka CM ka ama ni iba amala o jembiba tai matoktsü," ta pai ashi.



Srinagar, Khanayar tesem nung mosque ka aser iba den atonga aliba ki ka nung mi adokba sülen fire and emergency services personnel temi temseptsü merangba noksa nung angur.

Taliban-i longkak aiter tem senshidaktsü atema injang khaloksü



Kabul, Afghanistan nung Pakistan embassy anasa Pakistan anema longkak aitba Afghan nung tsütsü Taliban sepaitem aoba noksa ka yangi angur.

Kabul, Rongjui/September 7 (Agencies): Mongolbarnü Taliban sepaitemi Kabul nung longkak aiter tem senshidaktsü atema injang khalokja liasü. Pakistan-i Afghanistan telung ken o nung jushiba anema longkak aita liasü.

News agency AFP sangdong ka ajanga ashiba agi, tetsürtem agi tua longkak aiter 70 shi Afghan yimtiba nung Pakistani embassy kima longkak aita liasü. Parnoki Pakistan anema yimyim balala ayima liasü.

Afghanistan nung media company tulutiba Moby Group indang executive editor Saad Mohseni-i, Twitter ajanga video ka lemsatep, koba pai ashiba agi

Pakistan anema longkak aitba ka liasü. "Pakistan anema Kabul nung tang longkak aitar," ta Mohseni-i tweet asü.

Iba dak sendakba nung nisung asüba mesera yiruba osangbo kecha mali.

Pakistan intelligence tekolakba Lieutenant General Faiz Hameed-i Afghanistan nung Taliban-i aniba sorkar tasen ka amenoktsü atema sensak asemtsü asoshi Kabul semdangba sülen anogo ana lir iba ya atalokogo. Osang ajanga ashiba agi, Afghanistan semdangba mapang Inter Services Intelligence (ISI) tekolakbai Taliba indang lenir Mullah Abdul Ghani Baradar dena ajurutepa liasü.

Iba den bendenloksema

Panjshir province atsüngtsü atema Northern Resistance Front (NRF) den raraba mapang Pakistan Air Force (PAF)-i Taliban nem teyari agütsü, ta osang adoker aliba mapang Afghan nungertemi longka aitogo.

Taliban sepaitemi longkak aiter tem dak injang khaloktsüba ya tang mezüngbuba masü. Linük atsüngba sülen yimjung bener arutsü aser taitok agütsütsü nangzükker liaka parnoki tenangzükba ama mapa minyaki arudar. August 19 nü Afghan Independence Day amungba mapang Asadabad yimti nung longkak aiter tem dak Taliban sepaitemi injang khalokja longkak aiter aika khaset.

South Korea-i ballistic missile ka tendangogo

Seoul, Rongjui/September 7 (Agencies): South Korea-i par linük nung yangluba submarine-launched ballistic missile ka takok ngua tendangogo, ta osang ka ajanga Mongolbarnü metetdaksü.

North-i amokmerenba nungi linük kümzüka toktsütsü atema South-i military tashi ajungkettsü merangba mapang ka nung tang iba jenjang agiogo.

Pyongyang-i submarine-launched ballistic missile (SLBM) technology ajungkettsü meranga arudar aser January ita military parade ka nung ibala mesükba device pezü sayaogo, koba state media KCNA-i alima nung tashi taittiba hadir ta shia liasü.

North Korea-i 2019 küm tzü telung nungi missile khaloktsüba indang noksa lemsatepogo saka analysts temi iba ya submarine nungi masü saka amenoka aliba sabang ka mesera submersible barge ka nungi tendanga asütsü ta bilemer.

South Korea indang Agency for Defense

Development-i taoba hopta kidang yangluba 3,000-tonne class submarine ka nungi tzü telung nung SLBM ejection tests agia liasü, ta Yonhap sangdong ka ajanga metetaksü.

SLBM takok ngua tendangba linüktem ishika rongnung South Korea densemogo.

Seoul-i Hombarnü taruba küm defence technology research aser development atema won trillion 1.5 shi lemsüktsütsü atema budget benokogo.

Iba budget ya agizükra Defense Acquisition Program Administration, research budget shilem 76 agi ajungkettsü, koba cutting-edge, future technologies terenlok asoshi amshitsü, ta osang ka ajanga metetdaksü.

Kasa mapang nung Pyongyang-ia, submarine forces ajungkettsü merangdar, January ita Kim-i pai aniba Workers' Party congress ka nung nuclear-powered submarine ka yanglutsü atema North-i sentong yangluogo, ta ashi.

Canada PM Justin Trudeau dak long agi aon



Ottawa, Rongjui/Sept. 07 (Agencies): Canada Ato Kilonser Justin Trudeau nübuyima jajaba mapang longkak aiter temi long agi aon.

Pa ya brewery tesem ka semdang pa indang bus-i meyiba shilangba mapang long tilaka agi aon. Pa teyiru bo meyiru.

Par left-of-centre Liberal party atema sorkar nung menden timba ngutettsü teimla nung Trudeau-i anojungi election agitsü August ita tiyonglen sangdonga liasü.

Saka nisung ajak COVID-19 mozü agitsü aser danga tenokdangba agütsüba anema pa nübuyim nung timtem agüja longkak aiter.

Hopta ka tejakdang ato kilonser election rally ka agitsü sentong liasü, saka iba sentong nung ain adoka longkak aiter temi atsüka atar timtem agitsü.

London, Ontario nung iba timtem ajurur pa indang tayimtsü nung osangbener den jembiba mapang, Trudeau-i pa indang tapubang nung long agi aon ta ashi aser 2016 küm pa dak tetsür kati mapu jang agi aonba den medemdanga liasü.

Canada indang CTV National News indang osangbener kati ashiba agi, iba mapang media bus nung mena alir ana dak longsang agi aon saka meyiru.

Opposition Conservative Party lenir Erin O'Toole-i iba tatalokba ya tesempatsü mapa ka lir, ta ashi.

"Yimtenren tsütsü azüdokshi kodanga temeden mali aser asen media ya amokmeren, merenshiba aser azüdokshi nungi pila yutsütsüla," ta pai Twitter nung zülutsü.

September 20 nü election agitsü lia Trudeau-i nübuyim ajanga vaccine agidaktsütsü sentong yangluba ya tongtipang onük ka kumogo.

Civil servant tem - rail ama federally regulated sector nung inyakertem densema - October ita tatem tashinung COVID-19 mozü agitsüla, aji mesüra mapa nungi anentsütsü, ta sorkari taoba ita sangdonga liasü.

Commercial air, cruise aser interprovincial train passenger tema senzüsempongtsü atema mozü ya agitsüla, ta ashir.

Alima nung COVID-19 mozü timtiba agiba rongnung Canada ya ka lir.

COVID-19 prokshiba mechi Vietnam nung nisung ka tepuokdak ayur

Ho Chi Minh City, Rongjui/Sept. 07 (Agencies): Vietnam nung nisung kati COVID-19 quarantine ozüng tesashi raksa dangar dak virus menaloktsüba mechi court kati temerenshi küm pongu tepuokdak ayutsü obendang agütsü.

Linük south tsütsü Ca Mau province nung aliba People's Court nung anogo ka ken o jembiba mapang arishi küm 28 tain Le Van Tri-i lendong tulu aketba tashidak prokshiba

atema Hombarnü aija liasü, ta sorkar meyong Vietnam News Agency (VNA) ajanga ashi.

Vietnam nung nübur ajunga amai tendangba, tsüngsü apuba, arütsü akhang-akhanga shibangba aser ozüng tesashi quarantine nung ayuba ajanga alima nung coronavirus azüokba tsütsü takok anguba linük ka lir. Ajisüaka April ita tatemlen nungi iba tashidak ya tesem tesem nung pokteta otsü raksatsür.

"Tri ya Ho Chi Minh City nungi Ca Mau-i meyipa shilang aser anogo 21 quarantine ozüng raksa," ta VNA ajanga ashi.

"Tri-i nisung ti dak COVID-19 tashidak menaloktsü aser nisung ka ita ka anepalur asü," ta ashi.

Kasa ken o nung linüki nisung ana tema temerenshi ka ita 18 aser ka küm ana tepuokdak ayutsü obendang agütsüogo.

(Maneni tapak 9 nung...)



Belgian-British pilot Zara Rutherford (arishi küm 19), la indang Shark Ultralight airplane nung mener Panama City nung aliba Tocumen International Airport tonga arudang tangokba noksa ka yangi angur. Rutherford yagi otsü tasen yanglua single-engine aircraft nung kisung mener alima ajunga lunga jajar tanutsütila akumtsü meranger.

Northeast DR Congo...

(Tapak 8 nungi...)

Ca Mau ya Vietnam southernmost province ka lir, aser yangi tashidak wara tenzükba sülen tang tashinung cases 191 aser tasüba ana dang lir, koba linük nung coronavirus tesep, Ho Chi Minh City nung cases 260,000 jungntüa aser asüba 10,685 dang kanga agi tajemba lir.

Kanga kera aser mela menatepa aoba Delta variant mechi Vietnam nung wave pezübuba ya April 27 nü tenzükba liasü. Iba mapang COVID-19 agi nisung 35 dang sür liasü, aser tashidak menar nisung 4,000 tekübok liasü. Tanübo iba tashidak agi asür nisung 13,000 dak tema lir aser cases 520,000 jungogo.

Vietnam nung nisung asüba shilem 80 aser tashidak mena aliba ya tesadang ka shi linük nung yimti tulutiba, Ho Chi Minh City nungi lir.

Ho Chi Ming City nungya nisung million tuko alir, koba August 23 nungi total lockdown nung lir aser yangi alirtem chiyongtsü alitsü asoshia ki yutsür dokani meyoker.

Tenokdangba ya September 15 tashi alitsü, aser tasenba Ato Kilonser Pham Minh Chinh-i iba yimti nung nübürtem ajunga tendangtsü totuyuba agütsü aser nübürtem kidang alitsü asoshi ozüng agütsüba amshitsü atema sepaitem yoka lir aser choyongtsü ki tong abener arutsür.

PELABA LEMSATEPER

"Ozü arishi anogo tenemer metsü; Mesüra arishiaka küm lir anasü-ang". T. Ken 90:10



Asoba: 01.03.1943
Asüba: 02.09.2021

Onoki kanga meima aliba Tasü tait Walunir **Wabong Late T. Rongpang Rt. Teacher (Changdang)**. Pa akümüli wadang tempanger tanü 2.9.2021 nü iba lima nungi pila ogo. Pa shirangdang nungi tenzükba tasünü tashi kinunger, adianu, kiyonger, Yimer, kija kibong aser lokti balala nungi shirnokisa ozü asüko mapang tashi nubo, rongsen, sarasadem aser maparen balala agi nungita yaritepogo nenok ajak dang kanga pelaba lemsateper.

Tanü ozüi nenok nem kecha meyipa magutsüteter, saka takar Tsüngremi nenok mapa tajung asoshi maneni moajangma ta ozüi sarasademtsü.

Temeim kinungtsü, chirnurtem, semchirtem, kinungertem aser anükapang.

LAND FOR SALE Old Showuba Area

i) 5 Pura (Rs.90 per Sq.ft.) (ii) 14 Pura (Rs. 110 per Sq.ft.)
iii) Diphupar B 10,000 Sq.Ft (Rs. 350/- per Sq.ft)
For more details contace 9856603713

CPO-i pelaba lemsateper

Dimapur, Rongjui/September 07, 2021 (TYO): Chakhesang Public Organisation (CPO)-i National Health Mission, Nagaland dang pelaba lemsateper aser iba den külemi State nung Ibuba jenjang tongtetba nung District Hospital Phek ajanga Kayakalp Award anguba, PHC Thüvopisü-i best PHC category award, PHC Ruzazho aser PHC Dzulhami nati Commendation, Phek village HWC-SC-i best HWC-SC category award aser Mesulumi HWC-SC ajanga Commendation anguba atema

tenüngsang agütsür, ta sangdong ka ajanga CPO president Mikha Kenye aser General Secretary Veduvo Rhakho nati metetdaksü.

Iba ama tenüng tajung den award anguba asoshi tenüngsang agütsür aser item khonang ajanga Doctor, Officer Incharge aser staff temi bendanga agüja aser meranga inyakba kuli sayur. Tarutsü nunga nenok maparen ajanga tenüng tajung bener arutsü aser takok lidakjang ta CPO-i sasademtsür, ta kasa sangdong ajanga metetdaksü.

October 1 nü 'Venom: Let There Be Carnage' sayatsü



New Delhi, Rongjui/September 07, 2021 (Agencies): Sony Pictures indang kanga dang yongya ataba superhero film 'Venom: Let There Be Carnage', kong Tom Hardy-i tongti shilem agir, iba film October 1, 2021 nü sayatsü.

Variety sangdong ajanga angazükba agi, Marvel superhero film indang sequel ya October 2020 nung sayatsü renem, saka Covid-19 tensa mejungi akümiba ajanga June 2021 agi melen, iba sülen

September tashi anogo atsülangtsü aser tawa October 15, 2021 nungang sayatsü ta anogo atsülangja liasü.

Tang, Disney ajanga 'Shang-Chi and the Legend of the Ten Rings' film theater nung sayatsü osang sangdongba sülen, Sony-i October 1, 2021 nü 'Venom: Let There Be Carnage' sayatsü lemtet.

Canadian actor Simu Liu aser Awkwafina nati tongti shilem agiba film 'Shang-Chi and the Legend of the Ten

Rings' ajanga Labour Day weekend record tasen yangluogo, ta Variety sangdong nung shia lir.

'Venom: Let There Be Carnage' nung Hardy - Eddie Brock-i journalist ka ama pa temang nung alien symbiote ka bener shilem agiba angutsü. Eddie aser symbiote sentepa Venom akümer. Venom sequel nung Woody Harrelson-ia shilem agiba angutsü.

2018 küm sayaba 'Venom' indang post-credits scene nung actor Woody-i serial killer Cletus Kasady ama shilem agiba nguogo.

Movie tasenba nung Woody Harrelson indang character Kasady ajanga Carnage agi melena angutsü. Comic otsü nung Carnage ya Venom indang tsükchir tulutiba lir. Andy Serkis-i 'Venom: Let There Be Carnage' direct süogo.

Columbia Pictures film (Marvel aser Tencent Pictures den longjemer) nung Tom aser Woody dak alaka, Michelle Williams, Reid Scott aser Naomie Harris nungeri shilem agiba angutsü.

Avi Arad, Matt Tolmach, Amy Pascal aser Hutch Parker nunger longjemer iba film produce süogo.

Ruben Fleischer-i direct asüba original 'Venom' film ajanga alima ajunga box office nungi USD 856 million aazükogo.

Mamatetba Ojala, MENUNGRAA BILEMTETER



**Asür Temjensangla Imsong
08-09-2020**

Oja, Nai toktsür tanü küm ka abensar. Na onok den meliaka, na teti tepeladak lir ta onok mulung süngzüker aser ne temeim aser ne O tem onoki teti bilemteter.

Na onok mulung nung teti alitsü.

Temeim Kinungbo, Chirnur, Semchir aser Anük-apang

MRS. ANENLA LONGKUMER ORDAINED SÜOGO



Mrs. Anenla Longkumsür, la Changtongya Baptist Arogo nung Asso. Pastor Women Ministry nung Küm 23 buba teinyakdak lir. Arogoi la tenzükba wadang nung mulung süa 5th September 2021 nung ABAM ajanga ordained sutsüogo. La ya asen sensotsür rongnung mezüng ordained asür, asenok ajaki Tsüngrem nem tenüngsang tulu agutsüdi. Ordination Council parnok pungu prong metema arua sentong ajak takokma nung agia liasü.

**Rev.I.Wati Jamir
Pastor, CBC**

CHANGTONGYA BAPTIST CHURCH SARASADEM AYONGER

Sensosanger ajak dangi Yisu Khrista temeim salem abener. Mapang ajak nung bendanglen alirtemi Yimten aser Arogo nungita aruba asoshi pelaba shisemer. Tensa agi memelarji telok atenshia sarasadem mesütettsüa akok saka 11th Sept. 2021 Konda ana (2 hours) tanga pei kidang nai/ nuri agutsütetba mapang ka Shimteter asen Lima aser nubur asoshi sarasademtsü ayongzüker. Onük itemi mesukba agitsü akok. Tatok meshiba; Tsüngremi asen Yimer dang meimba asoshi tenüngsang; arishi meshiba aser manemshilurtem asoshi; Yimsüsürtem aser tanishirtem asoshi; Tsüngremer wadang nung tenzükertem aser Govt. mapa nung nokdaka alirtem aser Business inyakerkem asoshi; lanurtem asoshi aser 2026 tashi Christmas aser New Year nangzüka alirtem asosh; ano temoatsü meshiba amala.

**Nenoki meima aliba tenzüker
Rev. I.Wati Jamir
Pastor, CBC**

National Boxing Championships nung boxer pungoi shilem magitsü

New Delhi, Rongjui/September 07, 2021 (Agencies): Aruya aliba national men's boxing championship nung, pugilists pungo, shirnoki Tokyo Olympics nung shilem agia liasü, parnok rongnung boxer kati danga shilem magitsü akok, koba ajanga taruba ita Serbia nung ayongzüksü aliba world championships nung parnok madentsü ama asadangteter.

Taoba ita tembangba Tokyo Games nung, India nung boxer - Amit Panghal (52kg), Manish Kaushik (63kg), Vikas Krishan (69kg), Ashish Chaudhary (75kg) aser Satish Kumar (+91kg) nungeri shilem agiogo.

Parnok rongnung Satish Kumar dak alaka, asayar pezüprongla preliminary round nung tsükadok. Ano külen, Satish quarter final nung tsüka liasü.

Vikas, Satish aser Ashish nunger temang nung timtem aliba ajanga anepalua mungdar aser National Boxing Championship nungi par asempronlga tukadokogo. Amit aser Manish atema osang tejangja ka mali, saka sangdong ka ajanga angazükba agi, "asaya asoshi renemshitsü

mapang peria manguba ajanga tenati iba asayamung nung shilem magitsü akok.

"Tokyo nungi shilanger külen nungi training agitsü mapang peria manguba yong National asayamung nung tenati shilem magitsü lemtetogo. Parnok rongnung ka mesüra anati iba asayamung nung shilem agitsü asoshi bilemdangtsü akok, saka parnok kati danga iba asayamung nung shilem molunga mali," ta otongdar sangdong ka ajanga metetdaksü.

National Boxing Championships ya Bellary, Karnataka nung September 15, 2021 nungi asayatsü imlar.

Boxing Federation of India-i, Belgrade, Serbia nung October 26, 2021 nungi tenzüksü aliba World Championship atema, national championships nung gold medal angur boxer tem dang squad nung adentsü.

Olympics nung Vikas tapubang yiruba ajanga pa iba asayamung (National Boxing Championships) nungi tukuogo. Taoba ita, iba timtem anepalutsü atema pa surgery agi aser taküm November tashi pa masayatsü.

Ano külen, Satish-a Olympic

asayaba mapang, tenük anasa zübo keta yiruba sülen, iba championship nungi tukadokogo.

"Tenük anasa kanga mejungi kongshiba ajanga wakadok aser tawa ang iba zübo tera tajungba kümdar. Melungi training agi tenzükgogo, saka National asayamung atema ibajagi mepiritsu," ta Satish-i ashi.

Ashish-a takanük yirua liasü aser tang tashi junga taneptsü mengui lir.

"Tekanük anaprongla nung timtem lir aser doctor temi mapang tatsüka atema masayatsü asoshi teyüogo," ta phone ajanga osang-ola agitepba mapang, Ashish-i ashi.

"World championships asayar sülen ang National Championship ayongzüksü asoshi boxer temi tebilemba lemsatop. World championships atema trial tem agitetsü akok. Training peria magiba aser mapang peria maliba ajanga boxer aikati pei temang touzük shitak ayutsü asoshi timtemer ama bilemer," ta pai ashi.

"Tanga State rongnung Haryana-i state championships ka takok ngua achaayangogo aser tanünga State tem National atema team tem shimtsü trail agidar," ta pai shisem.

US Open: Emma Raducanu quarter final-i iogo



New York, Rongjui/September 07, 2021 (Agencies): British tsür asayar tasen Emma Raducanu-i tang asaya aliba U.S. Open nung maneni junga asaya arudar aser mezüing Grand Slam quarter-final tongtetsü asoshi, round of 16 nung lai America tsür Shelby Rogers madak 6-2 6-1 agi takok nguogo.

US Open ama asayamung tongtibang ka nung, last 8 tongtetta asayatsü ya tennis asayar tasen ka atema tezüba masü, saka arishi küm 18 tain Emma-i iba asayamung nung set ka nungdanga tamakok mengui quarter final tongteta lir.

Emma Raducanu, shibai Grand Slam nung mezüing ajemoka July ita Wimbledon asayamung round pezübuba tashi tongteta asayaogo, tang US Open nung ano lai shilem tajungba agia asayaogo.

"Nenek matsüandang (Stadium nung terepranger) asayatsü maongka anguba ya jangratemsüka lir aser Shelby ya asayar tajung ka. Taoba round nung lai junga asaya takok nguogo. Ibayongji round of 16 ya ni asoshi tasak asütsü ta bilema asaya," ta Arthur Ashe Stadium nung iba asaya temer sülen Emma-i ashi.

Emma-i Switzerland tsür seed

11buba aser Olympic champion Belinda Bencic den quarter final asayatsü. Tetsür kija round of 16 asaya tanga ka nung, Belinda-i 7-6(12) 6-3 agi Polish 2020 French Open champion Iga Swiatek madak takok angu.

"Asaya shia tajungba melenshia asayateter ama ni bilemer. Bodhbarnü quarter final asaya atema yongyar. Belinda asayar tajung ka lir, shibai asayamung balala nung takok ngua asaya aruogo, ajiasünung la den asayatsü asoshi kü asaya yimyattem tajungba melenshitsuila," ta Emma Raducanu-i ashi.

"Iba jenjang tongteta asayatetba ya ni asoshi kanga dang tongtibang. Shelby Rogers ya asayar takotet ka aser lai asayamung balala nung asayadanga lir, ajiasünung iba round nung junga asayatsüla ta kü molung nung tejembiba ka aru. Ashe Stadium nung mezüing asayar asünung, asaya tetenzüklen tera arendaka asaya," ta Emma-i shisem.

Arishi küm 28 tain Rogers-i taoba round nung World no. 1 Australia tsür Ashleigh Barty madak takok ngur sülen, iba round nung Emma den asaya liasü, saka meimlai ka iba asayamung nungi la tsükogogo.

US Open 2021: Djokovic o Pliskova na quarter-final-i iogo



New York, Rongjui/September 07, 2021 (Agencies): Tang asaya aliba US Open asayamung tebur kija Round of 16 asaya nung Novak Djokovic-i takok ngua quarter final tonggogo. Taküm tongtibang tennis asayamung nung Djokovic-i asaya 25buba tashi atonga takok angur asütsü.

Arthur Ashe Stadium kübok round of 16 asaya nung, America nunger wildcard Jenson Brooksby-i ghonda tesadangka tashi asaya amokbanger asaya mezüing set akok aser terepranger temi pa kanga pusema liasü. US Open asayamung nung America nunger tennis asayar ajak tsükadoker sülen pa tesübuba tsüker asütsü.

Ajisüaka, Grand Slam 20ben

takok angusang Serbia nunger Djokovic-i mezüing set (1-6) dak alaka 6-3, 6-2, 6-2 agi iba round koktet.

Grand Slam takok angutsü aser tennis putiotsü nung otsüsütsüsa Djokovic-i 21buba Major Champion abentsü meranga asayadar. Kasa mapang iba asayamung nung America nunger asayar ka anünga lia Djokovic-i tsükdaksüogo.

Arishi küm 34 tain Djokovic-i World No. 6 Italy nunger Matteo Berrettini den quarter final asayatsü.

Kasa asayamung tebur kija Round of 16 asaya tanga ka nung, Matteo-i 6-4, 3-6, 6-3, 6-2 agi Germany nunger O. Otto tsükdaksü.

Maneni, tetsür kija Round of

16 asaya nung seed pezübuba Czech tsür Karolina Pliskova-i Russia tsür Anastasia Pavlyuchenkova madak 7-5 6-4 agi takok nguogo. Iba asayamung nung Pliskova-i mezüing major title ka angutsü asoshi asayadar.

Iba asaya nung Wimbledon runner-up Pliskova-i set tanabuba nung Pavlyuchenkova indang break point 7 tashi nokdanga masayadang, mezüing set final game nung lai break point den külemi winner' tenet angu.

Taoba asayamung ana - taküm Madrid Open aser 2020 Australian Open nung Pliskova-i Pavlyuchenkova anaben tashi makokba sülen, tan U.S. Open quarter-final tongtetsü atema Pliskova-i Pavlyuchenkova madak takok angur asütsü.

Taküm Flushing Meadows nung World no. 4 Pliskova-i aces 58 takok nguogo, koba tanünga asayarterm (US Open nung) dang nungi timba asütsü. Pliskova-i Greek tsür Maria Sakkari den quarter-final asayatsü.

Arthur Ashe Stadium kübok tetsür kija round of 16 asaya tanga ka nung, World No. 17 Maria Sakkari-i 6-7, 7-6, 6-3 agi World no. 6 Bianca Andreescu madak takok nguogo.

ISL: Chennaiyin FC nung midfielder Ninthoi Meetei aniok

Chennai, Rongjui/September 07, 2021 (Agencies): Mongolbarnü, Indian Super League (ISL) anaben takok angur telok - Chennaiyin FC-i küm asem atema India football team nungi midfielder Ninthoi Meetei aniokba osang sangdonggogo.

"Iba club (CFC) nung adentsü maongka anguba asoshi pelar. Tesüiba küm nungi iba team-i asayamung nung takok ngua shilem agia aruba ni nguogo. Kü dak aketba sempet tajungtiba amshia iba team asoshi asayatsü ni imlar aser Chennaiyin FC den asaya tenzüksü asoshi yongyar," ta arishi küm 20 tain Meetei-i ashi.

2017 küm, India-i ayongba FIFA U-17 World Cup asayamung nung, Imphal nung soa intetsang Meetei-i India team nungi shilem agiogo. 2019 küm

India team-i mezüing SAFF U-18 Championship title akokba mapang, Meetei-i Best Player Award angu.

"Meetei Ninthoi ama asayar tajung ka aniokba atema onok pelar. Pa asayar tasen ka dang, saka ISL 24 nung pai shilem agiogo aser tarutsü nung pai team yaritsü imlar," ta CFC co-owner Vita Dani-i ashi.

AIFF Elite Academy nung training agisang aser right-winger asayar, Meetei-i 2017 küm Indian Arrows FC atema asaya aser küm ana tashi iba I-League club nung asayaba mapang Super Cup ana densema team tenüing nungi asaya 27 nung shilem agiogo.

ISL nung ajemoka Meetei-i NorthEast United FC atema mezüing asaya aser küm ana tashi The Highlanders atema match 24 asayaogo.

BILEMDANGANG

"Tesüiba tashimaitlen masü tarutsülen tesangwa nung aka soangma."